

Regional News Unit AIR Aizawl  
Tuesday, June 16, 2026  
Time - 7:30 -7:40 Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

- Vawiin hi YMA Day Vawi 91-na a ni a, he ni pual hian Mizoram pumah tukin atang khan YMA member te'n hun an hmang tan.
- Central sorkar-in Mizorama raltlan awmte tana cheng vaibelchhe 5 hu buhfai a thlawna sem tur a rawn ruahman chu sem hna buaipui mek a ni.
- Nikum July thla tawp atanga tan, Mizorama raltlante mit-naute leh kutze thla lak hna (biometric enrolment) chu zawh fel tep a ni.
- G7 Summit vawi 52 na chu France-a Evian khawpuiah tan a ni dawn

<><><>

### YMA DAY\*

Vawiin hi YMA Day Vawi 91-na a ni a, Mizoram pumah tukin atang khan kawng hrang hrangin YMA member te'n he ni pual hian hun an hmang tan a ni.

Vawiin YMA Day-ah hian branch YMA hrang hrangte chuan programme hrang hrang an huaihawt a. Zingkar atanga mahni vengchhung tihfai hnatlang huaihawt an awm a, chhun lamah YMA Hall hrang hrangah infiamna leh intihhlamna hun huaihawt tur an awm bakah Central YMA hruaitute telpuia YMA Day puala hun hmang tur an awm bawk a. Midangte tanpuina hun atanga hmang tur leh kawng dang hrang hranga YMA Day puala hun hmang tur an awm a ni.

YMA Day Vawi 91-na puala thuchah a tihchhuahah Central YMA President Pu R. Lalnggheta chuan ruihhlo zuartute chu chhungkua, khawtlang leh ram hmelma an nih thu a sawi a. Ruihhlo zuartute chu a tawp rat thleng umzui tur an nih thu leh an laka tlawm thei an nih loh thu a sawi a. Pu R. Lalnggheta chuan YMA Kumpulan "Ruihhlo Do" bawhzuiin hma pawh nasa takin an la tih a sawi a. Ruihhlo do turin Central YMA level-ah Central Anti Drugs Squad (CADS) dinin anni hian mutmu pawh tuah mumal hman loin theitawp chhuahin ruihhlo do hna hi an kalpui mek tih a sawi a. Hemi bakah Aizawl khawpui bik chu hmun 10 (Zone-10) ah inthenin hengah kan CEC leh Branch hruaitute hruaina in Zone Anti Drugs Squad (ZADS) ten tlaivarin ruihhlo do hna an thawk bawk tih a sawi a.

Hetianga an hmalaknaah hian ruihhlo pawh an man tamin ruihhlo zuartute pawh an um chep hle tih a sawi a. Hetiang bawk hian Sub-Hqrs. YMA, Group YMA leh Branch YMA te pawhin ruihhlo an do mek tih a sawi a. Mizo thalaite tibuitu ruihhlo leh a zuartute do kawnga hma an laknaah a lawm thu sawiin inthlahdah thei an ni lo tih a sawi a.

YMA Day Vawi 91 a thleng leh ta chu lawmawm a tih thu sawiin hmun hrang hranga a YMA Member puite hlim taka hmang turin duhsakna a hlan tih a sawi a ni.



LAWNGTLAI VISIT

Nimin khan GAD leh Environment, Forest & Climate Change changtu Principal Secretary Pu Sudhir Kumar chuan KMMTTP Road, National Highway 502A, Lawngtlai to Zorinpui dinhmun chu a hmun a kal in a enfiah.

Pu Sudhir Kumar chuan KMMTTP Road enkawltute kawmin, harsatna an tawh te sawipui a. Kawngpui siamthat ngai leh thawmthat ngaite chak zawk leh tha thei ang bera thawk turin a chah a, Myanmar ram chhunga kawng siam hna thawktu Manager, ICON Infrastructure nen ramriah inbe bawkin, chak thei ang bera thawk tura beisei an nih thu a hrilh a ni.

Principal Secretary hian Deputy Consevator of Forest, Chhimtuipui Wildlife Division, Lawngtlai District Office a tlawh bawk a ni.



CONVICTION\*

Aizawl judicial district a Additional & Sessions Judge chuan BSF mi 2-te chu hmeichhe pawngsual rawn leh acid hmanga theh chungchangah thiam loh a chantir.

Additional & Sessions Judge-1 Pi Sylvie Z. Ralte chuan BSF mi 2 Nilanjan Das leh Dinesh Kumar te chu hmeichhia pawngsual rawn a acid a theh zui bawka puhte chu Zirtawpni khan thiam loh a chantir a. Naktuk hian anmahni hremna tur thupek a puang ang. Prosecution lam sawi danin kum 2017 July ni 18 khan Marpara Police Station-ah thubuai ziahluh a ni a. BSF mi pahnih hian Mamit district a Silsury West BSF Post-a an awm laiin kum 2017 July ni 16 khan chakai khawrh leh ramhnuai a chawhmeh zawnga kal hmeichhe pahnih zinga pakhat chu a thiannu zun zunga a kal hlanin an pawngsual rawn a, a hmai-ah acid-in an theh bawk a. A hmai vel hi a kang nasa hle. He thil thleng hi chhui chian a nih hnu-ah Marpara Police Station-ah hian IPC section 326A, 376D, 376(2)(m) leh 34 hmangin thubuai ziah luh a ni.

A thiannu pawh hi an zawn hnu-ah a tukah a bul lawkah a ruang hmuh a ni a, tualthi ngei ni a hriat a ni. Pawngsual tawktu hi endik a nih bakah a thawmhnawte endik a ni a, nunna chan ta thawmhnaw pawh hi Forensic Science Laboratory-ah endik a ni bawk a ni.



RICE FOR REFUGEES\*

Central sorkar-in Mizorama raltlan awmte tana cheng vaibelchhe 5 hu buhfai a thlawna sem tur a rawn ruahman chu sem hna buaipui mek a ni.

Home Secretary Pu Vanlalmawia'n Akashvani News a hrilh danin district hrang hrang hian a buhfai a thlawna sem tur hi an sem tan mek tawh turah a ngaih thu a sawi a. Siaha district bawrhsap Pu VL Hruaizela Khiangte chuan kar kal ta Ningani atang a sem tan tur khan ruahmanna an siam thu a sawi a.

Lawngtlai district bawrsap Pu Donny Lalruatsanga chuan chawlhkar thar Thawhlejni atanga sem tan an tum thu a sawi. Kolasib district bawrsap Pu H. Dotinbuaia chuan an district chu an la muan hret tur thu a sawi a. A bik takin Manipur atanga lo lutte hian haw an tintuah reng a, tun hnai-ah pawh Churachandpur a an chhohna tur bus an ruahmansak a, mahse, an thulh leh niin an sawi. Chuvangin raltlan awm zat hi chhiar that leh phawt a ngai dawna a hriat thu bawrsap chuan a sawi.

Puan tawh angin cheng vaibelchhe 5 hu buhfai hi a vai chuan metric tonne 1,291 chuang zet a ni a. District tin a raltlan awm zat a zirin, sem a ni dawn a. Central sorkar hian kum 2024 khan Mizoram a awm raltlante hi cheng vaibelchhe 5 hu buhfai a thlawnin a lo sem tawh bawk a ni. Mizoramah hian Home department chhinchhiah danin Myanmar atanga raltlan mi 29,702 an awm mek a, Bangladesh atanga raltlan hi mi 1,671, Manipur atanga raltlan mi 7,344 an awm mek bawk a chhut a ni. Myanmar raltlan awm tamna ber chu Champhai district niin mi 12,083 awm anga chhinchhiah a ni a, buhfai hi quintal 4,460 ruahman a ni a. Raltlan awm tamna ber dawttu Lawngtlai district tan quintal 2,850 sem tura ruahman a ni a. Lawngtlai district-ah hian Myanmar raltlan mi 6,328 leh Bangladesh raltlan mi 1,353 an awm mek a ni.

Buhfai hi Ministry of Consumer Affairs, Food and Public Distribution (MCAF&PD) in FCI kaltlangin Mizoram Supply department hnenah a rawn thlen tawh a. District tina Supply department kudama dah tawh niin, a khah hlawm avangin June ni 30 hma a sem vek hman tum a ni.



#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 7 leh a chanve-ah Chanchinthar puan leh a ni ang.



#### BIOMETRIC ENROLMENT

Nikum July thla tawp atanga tan, Mizorama raltlante mit-naute leh kutze thla lak hna (biometric enrolment) chu zawh fel tep a ni.

Home department hotute sawi danin Myanmar atanga raltlan mi 29,727 zinga raltlan mi 29,047 te biometric enrolment chu zawh a ni tawh a, chu chu za zela 97 point 71 a ni a. District 11 zinga district paruk – Aizawl, Champhai, Lunglei, Mamit, Khawzawl leh Saitual district-te chuan an zo fel tawh a. Serchhip district hian za zela 99 point 86 an zo tawh a, Kolasib district-in za zela 96 point 15 zo tawhin Lawngtlai district pawhin za zela 95 point 83 an zo tawh a ni. Myanmar raltlan awm tam ber palina, raltlan 3,075 awmna Siaha district hian za zela 88 point 62 chauh an la zo a, raltlan 622 chauh awmna Hnahthial district hian za zela 90 point 51 an zo tawh a ni.

Bangladesh raltlante biometric enrolment pawh zawh fel hnaih a ni tawh a. Zirtawpni thleng khan Bangladesh atanga Mizorama raltlan mi 1,482 zinga 1,447 te biometric data chu khawn a ni tawh a, za zela 97 point 64 a tling tawh a ni.

Bangladesh-a Chittagong Hill Tracts atanga raltlan lo lut awm tamna ber Lawngtlai district-a awm mi 1,164 zinga mi 1,129 (za zela 96 point 99) te biometric enrolment tih tawh a ni a. Tih zawh thuai beisei a ni. Bangladesh raltlante hi Serchhip district-ah 235, Lunglei district-ah 75 leh Aizawl district-ah 7 an awm ve a, anniho biometric enrolment hi tihfel a nihna a rei tawh a. Lawngtlai district hi Myanmar raltlan awm tam berna dawttu a nih avangin hna a kal chak thei lo ni a thu dawn a ni.

<><><>

12 YEARS OF NDA GOVT/PMJVM\*

Tribal mipuite tihmasawna PMJVM hnuaiah Serchhipa Vawk vulhtu mi 62 te'n Dekchi, khâp 10 a lian theuh an dawng.

Inrinni khan Serchhipa vawk vulh pawl, Serchhip Town Piggery Cooperative Society ten Serchhip P&E, Judicial Venga an Ranchaw herna ina Assembly an hmannaah dekchi hi sem a ni a. Serchhip District Cooperative Officer Pu C.Lalhruiatluanga'n he hun hi hmanpuin ASF vangin Vawk vulhtu tlem tial tial mahse, theihtawpa tan la chho a, ran vulh lama tan la in an bel lian dawn chu tangkai taka hman tum turin a kalkhawmte a fuih a.

DCO chuan Pradhan Mantri Janjaty Vikash Mission (PMJVM) sawifiahin tribal te thil deh chhuah man man taka hralh chhuah dan kawng zawn a, sumdawna mumal taka kalpui theih dan ngaihtuah chu a tum ber a nih thu a sawi a. Serchhipa Vawk vulh Society te tan pawh Kawlri Van Dhan Vikash Kendra Self Help Group dina chumi hmanga hamthatna leh hlawkna tur dap chhoh a nih thu a sawi bawk a ni.

Serchhip Town Piggery Cooperative Society Lalbiakdika Sailo chuan PMJVM hnuaiha hamthatna hrang hrang an dawng chu lawmawm a tih thu leh sorkar laipui hotute chung a lawm thu a sawi.

<><><>

G7 SUMMIT

G7 Summit vawi 52 na chu France-a Evian khawpuiah tan a ni dawn a. Ni thum awh tur he Summit ah hian G7 member-te Canada, France, Germany, Italy, Japan, UK, US leh European Union hruaitute an kalkhawm ang a. Hei bakah hain a thlengtlu France-in a sawm angin India, Brazil, Egypt, Kenya, South Korea, Qatar, Saudi Arabia, Syria, Ukraine, leh UAE te chu outreach partner angin an tel ve ang. Prime Minister Narendra Modia chuan naktuka Outreach Session neih hunah a telpui dawn a. Tun tum Summit ah hian khawvel politics thilthleng pawimawh tak tak chungchangte, remna leh muanna chungchang bakah rualkhai taka ram eibar thanna tur leh khawvelin harsatna a tawh lian zualte an sawiho ang.

<><><>

PM

Prime Minister Narendra Modia chuan vawiinah Slovakia PM Robert Fico chu Bratislava khawpuiah a kawm dawn. Hei bakah hian Pu Modia hian Slovak President Peter Pellgrini a hmu dawn bawk a.

Pu Modia chaun tun tuma Slovakia a tlawh chuan India leh Slovakia inkara thawhdunna nasa zawkin a ti hmasawn dawn a ti a. Vawiina an inkawmna chuan rah tha tak a chhuah a beisei thu a sawi bawk a ni.

Slovakia in kum 1993-a zalenna a neih hnuah tum hi India Prime Minister-in a tlawh hmasak ber a ni.



## FIFA WC

FIFA World Cup 2026 khelh mekah nizan khan Germany chuan 7-0 in Curacao an hneh a. Tugin dar 3:30 inkhelah Netherlands leh Japan te goal hnih ve ve thunin an inhnehtawk a. Tugin khan Ivory Coast chuan goal khat in Ecuador an hneh a. Tunah hian Sweden leh Tunisia an inkhel mek a ni.

